

四庫全書

集部

欽定四庫全書

集部

梁谿集卷六

四至

詳校官庶吉士

臣張溥

侍讀

臣孫球覆勘

總校官知縣

臣

楊懋珩

校對官中書

臣

潘奕雋

謄錄監生

臣

莊承簪

欽定四庫全書

梁谿集卷四

宋 李綱 撰

賦四

乘桴浮于海賦

濁醪有妙理賦

三黜賦

折檻旌直臣賦

有文事必有武備賦

乘桴浮于海賦

鳳也有時
乘桴浮海

鳳鳥不至島夷是圖顧卒老於環轍遂決意而乘桴悼

道不行已焉哉吾往矣好勇而義從我者其由乎蓋以
道大不容材高難送歷聘而無所鈎說立言而徒焉折
衷長沮問而知津接輿過而歌鳳用於鄒魯猶舟車易
地而行窮於商周踐芻狗已陳之夢曷若脫此世網適
乎海涯進退去就之在我損益盈虛之有時凌重溟之
浩蕩閱萬象之壞奇廓爾無垠乍心凝而形釋泛然不
繫乃神動而天隨挹不可窮遊無何有晝所適兮憑萬
里之長風夜何方兮瞻七星之維斗井蛙聞風而跼坎

所以震驚河伯順流而望洋宜其知醜豈不以雖險利
涉惟虛可乘樂天命而無適非土仗忠信而其安如陵
六合軒呈知乾坤之高厚八紘開露觀日月之沈升實
由停蓄無私含容善下渺無涯涘雖七旱而何傷來有
淵源沛百川而皆瀉夫子遊焉吾道窮也蓋抱德以行
藏豈留情於用捨去聖既遠餘風未休魯連感時而高
蹈管寧避世而長浮風浪喧豗未若讒波之險魚龍出
沒尚寬寇盜之憂爰有羈臣遠投瘴海短髮白而早衰

寸心丹而不改荷三朝之眷知雖萬死而何悔仰聖哲之風流庶茲誠之有在

濁醪有妙理賦

神聖功用無捷於酒

次東坡韻

盡棄糟粕獨留精醇導性理以通妙知麴蘖之有神融方寸於混茫處心合道齊天地於毫末遇境皆真厥初生民時維司命天有星以垂象周建官而設正泉香器潔既曲盡於人為氣烈味甘乃資陶於天性蓋百禮之

所須寧五漿之可並荒耽失職當戒羲和之湎淫溫克
自將宜法文武之齊聖良辰美景明月清風沸新篳之
蟻白滴小槽之珠紅味流霞而細酌掃浮雲之一空醇
德可嘉頌觚瓢於劉子醉鄉不遠記風土於無功恍爾
神遊窈然心縱天光泰定而遺萬物根塵解脫而忘六
用藉之飲藥能資疾疢之痊或使墜車豈覺死生之重
嗟夫此異隨珠寒可當襦此異和璧飢可代餬療飢寒
以飽暖化憂忿為懽娛信麴生之風味豈侍坐之可無

霞散冰肌謝仙人之石髓紅潮玉頰殊北苑之雲腴又
曷貴盜醉甕下見鄱州閭得飲墻間歸驕妻妾三升起
待詔之戀千首矜翰林之捷分田種秫未訝淵明之迂
看劍引盃更覺少陵之俠治則醒而亂則醉其智足稱
飲愈多而貌愈恭其賢可接是知察行觀德莫酒之如
自昔達者必取之歟飲而粹者元魯山之德也飲而拙
者陽道州之政歟袒裼相從笑竹林之七逸供帳出餞
賢都門之二疏故我取足於心得全於酒內以此而怡

弟昆外以此而燕賓友雖一盃與一石同酣適之功又何必吸百川以長鯨之口

三黜賦

直道事人
宜乎三黜

賢若下惠官為士師以直道而從事乃屢黜之為宜忘已為人何爵祿之足惜捨生取義豈威武之能移法古守官屈身徇道位雖卑而道何所辱義或失則位焉敢保寧尸祿以素餐將啜菽以忘老君違必諫雖犯顏而何傷天聽孔昭恐獲罪之難禱何則忠以得罪分焉所

甘以所守之惟一故遭黜而至三用則行而舍則藏顧
有進則有退仰不愧而俯不忤夫何懼而何慙枉道事
人奚必去父母之國直心行道焉往無譖愬之談惟君
與臣代天理事各盡其職非相為賜諫行言聽固同享
於安榮道廢身藏亦何心於怨懟惟知則止之節乃盡
事君之義相彼君子異乎小夫以容悅得君為至計以
緘默固位為良圖蓋亦陋矣何足算乎老栢千年凡幾
經於凝洹精金百鍊乃可試於洪爐惟此展禽雅安降

逸雖不辭於小官亦弗免於三黜蓋以和制行者所以
與人為徒以直事人者所以本天之質類夫子文之稱
忠喜怒不形於仕已有若孟軻之不動榮辱豈存乎得
失矧乃作士利用刑人上下其手而楚國以弊輕重其
心而漢法以淪徐有功之任司刑守法而代人以死張
釋之為廷尉讞獄而舉世推仁蓋聞風而有立雖愈久
而彌新爰有畸人號為拙直荷三朝之眷遇辜負明恩
雖九謫而終歸敢忘大德惟內省不疚於聖言顧用捨

豈繫於人力味前哲之遺風每撫篇而太息

折檻旌直臣賦

修述折檻
深旌直臣

士有敢諫君當體仁爰修飾於折檻以表旌於直臣收
電迴霜已寬斧鉞之戮葺隳因闕更瞻軒陛之新惟漢
朱雲希風汲黯偶賜楓宸之對因致龍鱗之犯指陳姦
佞願借尚方之刀退就誅夷遂折便朝之檻辱師傅之
貴雖曰敢言干雷霆之威自應可斬而天子能恕將軍
敢爭因免冠而致悟乃飾檻以為旌寬以納忠豈獨垂

萬世之訓闕而當宁更以致三墀之榮易令名以愧賢
詎能比跡藏斷畧以志諗庶可同聲原此狂生素稱義
烈雅有意於漢室故屢陳於主闕命駕徑去不為薛宣
而少留趣和藥來更助蕭公之引決惟直情而徑行故
太剛而必折成帝淵默臨朝靚深謂陳善閉邪者小臣
之難事而尊賢從義者大君之用心難甘切直之言雖
加譴怒終懋矜容之德曲示承欽然而所求者名不務
其實文雖足觀質焉可述寵昭儀而絕皇嗣大戮天倫

恩元舅而殺王章遂傾帝室雖存折檻足為後世之規
實廢嘉言詎救當時之失豈不以篡漢室者必王氏佞
王氏者惟張侯以師臣而取信乃保身而自謀隄防禍
機實為國之至要拔去姦本期厥德之允修能充葺檻
之心何施不可深味借刀之旨豈謂無由凡曰司聰皆
有言職欲致國家之治必盡箴規之益魏公獻疏乃切
論而危言賈生上書亦流涕而太息遇文帝太宗之君
必能褒崇於正直

有文事必有武備賦

文事武備
全才必兼

刑作教弼文資武全惟兩器之兼用乃一道之當然欲
柔順之可行必須剛克致德禮之不易允賴威權原夫
夾谷之盟真儒相事謂敵國素稱於多詐而上策莫如
於自治兩君為好雖事多獻酬交錯之文具官以從必
武有豫備不虞之志豈不以文待變友武懲姦回惟無
忘於經畧乃克致於懷來勇不懼而仁不憂固並推於
達德文足昭而武足畏蓋有俟於全才德以服人義存

禦侮有所濟者以威之克愛無能達者以仁而不武雅
歌吉甫宜為憲於萬邦頌美僖公能昭格於烈祖下馬
為臣上馬為君不能全文武之道何以致久大之勲冠
履圓方載施佩玦之斷黼黻辯義式彰火藻之文有國
有家惟仁惟義雖誕敷於文德宜克修於武備所以六
卿率屬出分鄉遂之兵三時務農隙講蒐狩之利蓋以
治安之本在於文武之兼其相濟若火之於水其相待
若梅之與鹽勸賞畏刑以陽舒而陰慘揆教奮衛遂西

被而東漸大哉武之於文雖二而一藏於無用之用蓋以不必而必方今外患侵而中國微安得文武全才以股肱於帝室

梁谿集卷四

欽定四庫全書

梁谿集卷五

宋 李綱 撰

古律詩一

宣和己亥己前四首
已後作六十九首

士特下第之衡湘 子房

讀楚元王傳

謁告迎奉聞親闈有醴泉之除作詩寄二弟

奉酬胡俊明見寄 用前韻留別諸弟

同叔易季言遊虎丘寺邂逅何得之

吳江五首

阻風遊寧境寺

松江第四橋

操舟

雜興四首

韓賈

田家四首

嘉禾道中遇夏侯子陽

臨平見山二首

小雨

將次錢塘

靈隱宮

望潮

自哂

北望

張南仲置酒心淵堂值雨

長至

渡浙江

桐江行贈江致一

覺度寺

嚴陵灘下作二首

蘭陵訪吳聖與不遇

陸行

水磴

戲為吳語

絕句

次退之藍闕韻

三衢道中

雜興三首

戲成絕句三首

偶題

玉山道中五首

望龜峯

述懷

短歌

遣興三首

江南六詠

宿禪月堂

巖石村店有石泉梅橘幽雅可愛

送士特兄下第之衡湘

都城三月春暮時通津兩岸楊花飛送君結束適南楚
使我歎息生長悲男兒功名致須早夫子聲譽久已馳

文章黼黻雖自許時運齟齬將安施
霜蹄蹙蹶未為失雲翮高舉終非遲
人生且求適意處天命會有不否期
瀟湘千里渺煙浪浮家早逐秋鴻歸
娥英事實素難考來時為讀黃陵碑

子房

漢楚存亡談笑中子房初不有其功
閉門辟穀思輕舉肯歎淮陰犬與弓

讀楚元王傳

設醴當年為穆生偶忘微禮便辭榮固知申白無先見
衣赭髡鉗始自驚

謁告迎奉聞親聞有醴泉之除不勝慶忝作詩寄

叔易季言二弟

薄宦便甘旨兩載官南徐江山富佳致足以為親娛昆
弟盡在傍承顏懼有餘寧知驛書召結束趨征途旅食
寓京華夢想懷庭除宸恩賜清燕天語聞都俞蘭省幸
備員匪才慙冒居思親動歸興謁告之東吳曉出通津

門輕舠泛汴渠鶯花已爛熳榆柳正扶疎去去指苔雲
行行遠神都中途聞吉語動色觀除書天子隆孝治朝
廷優老儒犬馬志欲養獲此伸區區丘山恩施重螻蟻
輕捐軀寓書東飛鴻早早達吾廬季也在親側援琴方
舞雩聆音想慰懌具駕無踟躕會言亦近止期以薰風
初

奉酬胡俊明博士見寄

載筆螭坳侍九天謫來山澤作臞仙鳴岡敢並啣
鳳

感氣聊同嘒嘒蟬引義每慙爰叔直著鞭常恐祖生先
庭闈一去三千里自歎飄零曷日還

用前韻留別諸弟

久陪鴛鴦日朝天却愛江湖作散仙但有園林種松菊
便勝冠冕著貂蟬棣華春早相輝映鴈序風高自後先
慙此睽離休悵望為荒三徑俟予還

同叔易季言遊虎丘寺邂逅何得之

理權適閩粵虎丘聊艤航霜林正搖落翠栢森成行入

門躡磴道喬木間踈篁秦帝試劒石破瓜分路傍生公
雨花臺說法今不亡蒼蘚衣峭壁枯荷響迴塘遂遊劒
池上毛髮森以張沈沈下無底疑有虬龍藏鐫削露天
巧胚胎勞混茫清奇儼圖畫祕怪巨測量辟荔疊秀色
枇杷吐幽香行行造梵宇金碧相煒煌危脊聳古殿長
腰曼脩廊憑虛架雲閣鑿險通禪房開軒俯吳會蜂窠
繚池隍風煙寄遠目心逐征鴻翔列岫靄遙碧平湖湛
孤光追尋殊未倦策杖登崇岡幽獨詩句苦闔廬丘塚

荒五聖瞻象設羽泉酌甘芳西庵何聞寂修竹自蒼蒼
脫履足生繭解衣汗如漿却攜二三子置酒白雲堂念
舊已悽惻感時增慨慷況我方遠涉狷介懷剛腸一杯
且相屬世事都茫茫冠冕志已冷山林興偏長逝將脫
羈束超然做羲皇斯遊信清絕去去何時忘

吳江五首

重過松江憶舊遊依然風景照行舟危橋跨水虹垂影
高閣憑虛蜃吐樓渺渺衡煙歸釣艇輕輕點浪舞沙鷗

暮天橫笛江村起激烈能令逐客愁

木落水寒天氣清江湖合處一橋橫波濤萬頃琉璃滑
欄檻千尋蟬蛸明茶竈筆牀隨陸子蓴羹鱸膾憶張生
他時若我歸來後定向江頭事釣耕

返照澄波徹底明江邊弭櫂若為情風煙漠漠無今古
舟楫紛紛盡利名潮落片帆歸浦嶼雲寒一鴈過江城
孤臣放逐三千里此去龍津尚幾程

繫纜江頭日脚沈鱸肥酒美只孤斟長橋千步風濤穩

橫笛一聲煙水深契濶離親寧素願迂愚報國祇丹心
遠遊自是男兒事更把離騷細細尋

鱸鄉宜曠望煙靄起層陰謳軋艣聲急蒼茫江色深
潮寒入浦宿鳥暝投林誰識登臨意愁來遽不禁

過吳江阻風遊寧境寺

扁舟渡松江慘淡天色惡勝遊得禪房曠望倚虛閣
軒楹俯巨浸雲水互參錯長風駕驚浪飛雪相噴薄
未應神龍怒端有蛟鼉作片帆天際來飄忽如隕籜
波濤浩

無涯撐突殊不愕奈何操我舟惴慄纜添索蜚廉也世情逐客正落窳深夜始歸眠蓬牕聽鳴鐸

松江第四橋

舟人云橋下有老蛟

松江第四橋風雨不可過下有百尺蛟蜿蜒枕橋卧窟宅據要津口腹長饑餓每憑波濤勢能作舟楫禍安得飲飛手坐使神姦破往來永無虞時鼓清江柂

操舟

吳兒便操舟衣服皆楚製出沒波濤中端如履平地江

湖渺千里鼓枻等遊戲臨深詎保身涉險惟射利天風
難與期飄驟出非意傾覆瞬息間永為魚鼈餌願言戒
畏塗巧手不可恃

雜興四首

邑犬驚行客林鳥啼曉霜山村雲冉冉澤國水茫茫移
櫂輕舟穩釣簾野興長誰知因謫宦得到雲水鄉
肅肅歲華暮霏霏烟靄深輕水依淺渚寒日映疎林故
邑懷親日扁舟去國心凝眸無限景愁絕不成吟

片帆隨鳥翼，離恨滿江鄉。
風細雲衣薄，日斜波影光。
牧童寒哨笛，漁艇靜鳴榔。
景物正清絕，桑榆還夕陽。
暮天來遠色，行客尚貪行。
櫂急浪花碎，月高雲縷輕。
巢鳥棲更起，漁火暗還明。
獨寢不成夢，夜寒聞鴈聲。

韓賈

退之守潮陽，戚嗟見章表。
賈生傳長沙，自廣託鵬鳥。
拘達言雖殊，均為未能了。
今我謫龍津，莞庫素所曉。
粗令職事辦，便覺溪山好。
燕坐一室間，妄念悉除掃。
豈復計

窮通端亦忘壽夭回觀古人心頗歎二子小

田家四首

江村烟水遠茅屋兩三家斷岸垂衰柳疎篁隱細沙田疇賸秔稻網罟足魚蝦不識官遊味見人還歎嗟

場圃事方畢稻梁成已勤兒童自逐逐雞犬亦欣欣啼鳥霜林暮卧牛烟草昏田夫樂歲稔斗酒共醺醺

柴門臨小浦竹徑遶幽莊雨剪葵韭滑夜舂秔稻香年豐飽妻子日夕下牛羊誰識田家樂拂衣歸興長

誰謂田家苦田家樂甚真鷄豚燕同社簫鼓祭瘟神
高廩方有歲西疇行復春但令租賦足終老得相親

嘉禾道中遇夏侯子陽

京華契闊已再冬扁舟野岸欣相逢天寒水遠飛霜風
談笑坐覺廻春容年踰七十兩頰紅真氣上汴泥九宮
剖符南海窺祝融欲求丹砂訪葛洪問予執筆侍九重
胡為謫墮溪山中迂愚久合親耕農君恩未報徒忡忡
飄零孤跡隨斷蓬他日相憶看雲鴻

初到臨平見山二首

我見青山若故人，峯巒照眼自相親。
只應今日愛山意，便是他時傲世因。
點綴白雲春縹渺，縈迴綠水晚蒼淪。
君恩若許歸田里，定卜山間老此身。

孤舟渺渺兩山間，終日鉤簾只看山。
落日半銜霞未散，疎林遠暝鳥初還。
淒涼離恨誰能寄，浩蕩詩愁自莫刪。
頗有青山可人意，與君相對且開顏。

小雨

小雨晚初急，暝雲深不收。
霏霏暗煙樹，索索響蓬舟。
山色增遠翠，漁蓑生暮愁。
淒涼蘇季子，寒覓敝貂裘。

將次錢塘

歲晚飄零日，舟行杳靄間。
江鄉多霧雨，風物近湖山。
獨鶴徊翔久，飛雲自在閒。
遠遊殊未已，蕭颯鬢毛斑。

靈隱宮

我昔曾遊飛來峯，白猿畫掛峯上松。
曄然靈光如彩虹，鐘磬自響金仙宮。
宦遊漂泊西復東，雖欲再到無由從。

帝居鈞天陋瀛蓬螭坳截筆侍重瞳逆鱗聊試摩神龍
謫墮劔浦山重重征鞍來此尋舊蹤恍如夢落煙霞中
朱樓寶殿飛玲瓏寒泉幽石欣相逢門前池館虛含風
一洗塵慮清心胸明朝南去隨征鴻惆悵勝遊回首空

望潮

樟亭一望浙江潮震地凌空氣象驕十萬軍聲來海嶠
三千銀界混煙霄素車白馬縱橫驚翔鷺飛鷗散漫飄
好是波平風穩後一帆千里不崇朝

自哂

自哂何為者南遊亦偶然未登離垢地端有散花天遇
境聊為戲安心不離禪幽懷誰與共深炷一爐煙

張南仲置酒心淵堂值雨

自別西湖日置懷却因謫宦得重來雲深不見孤山寺
風急難乘搖碧齋未放幽情窮水石且將離恨泥樽罍
勝遊須徧山南北何日晴天為一開

北望

迢迢休北望汨汨正南遷出處豈無意阨窮那問天銷
愁憑酒醖遣興賴詩篇詩酒吾家事從今號謫仙

長至

黃鍾之宮萌一陽萬彙滋發猶潛藏書雲詎復別祥異
揆景漸可知舒長閉關不行著易象客子倦遊悲故鄉
周南太史長太息禋祀無因陪裸將

渡浙江

理權適桐江隨潮過魚浦山寒雪猶積江迥月初吐御

氣凌煙霄乘槎渡星渚空濛老龍吟髣髴翠蛟舞境清
人自愁夜靜氣尤古獨坐不成眠霜晴聽津鼓

桐江行贈江致一少府

放浪江湖乃吾樂羈東軒冕非所榮謫官去為劍浦吏
鼓枻遂作桐江行艤舟浙岸候潮至百越微茫煙水外
波橫天際海倒流噴雪驚雷聲震地須臾風軟潮已平
片帆去逐飛鴻輕櫂謳四起日西落暮天杳杳惟參橫
江山蒼蒼負殘雪江水茫茫浸寒月誰云逐客苦悽涼

今我斯遊最奇絕清晨弭櫂桐君廬溪光山色世所無
故人見我一笑粲殺雞為黍聊相娛嗟予仕宦等遊戲
斷梗飄蓬本無蒂但令景物供吟哦出處窮通何足計
此行幽討殊未闌滿目疊疊皆雲山鷺飛魚躍石齒齒
今夜且宿嚴陵灘

覺度寺

夕發富春渚朝次桐君廬桐君採藥地今作僧家居石
磴上窈窕林花下扶疎山根二江合清波見遊魚霜晴

響鐘磬日落歸樵漁客從何方來弭櫂聊踟躕清景難
久駐悵然還問途

嚴陵灘下作二首

世祖龍飛萬國朝故人依舊隱蓬蒿羊裘肯換貂冠貴
釣石終齊鳳闕高共宿客星親帝座貽書直氣壓時豪
東京臣子多名節皆自先生鑄此曹

帝座高懸漢客星樵漁今亦想英聲釣臺直下三千尺
誰謂先生只釣名

蘭溪訪吳聖與不遇

夕次蘭溪縣溪山照眼明雲端雙塔聳烟際一橋橫久
旅易悽感舊遊如隔生故人尋不值飄泊若為情

陸行

水落石出溪難行捨舟束裝趨路程徒御誼呶鳥雀噪
衣冠瓌偉兒童驚天寒野廐怯霜露日暮途遠傷蓬萍
我生胡為浪自苦濁酒且向燈前傾

水磴

鑿木為機運不休溪邊疊石駛溪流但知隨水能旋轉
肯道春糧不自由輪輻詎為君子器機關端與小人謀
方知抱甕漢陰老混沌何須是假脩

戲為吳語

莫問儂家作底愁細思今古事悠悠只因讀得數行字
便覺分為一世憂問舍求田須更以濟時澤物且能休
梁谿幸有閒泉石正好歸來作故侯

絕句

殷侯左降惟書字陸相南遷不著書今我新詩三百首
坐令二子覺區區

次退之藍闕韻

奏疏螭坳上九天謫官劒浦路三千披陳肝膽成微志
跋涉山川賴壯年緬邈寄書黃犬後淒涼陟岵白雲前
君恩欲報知無所清夢時時到日邊

三衢道中

行色虛無裏人聲煙靄間浪紋來穀水地勢逼柯山淺

瀨通舟溢飛橋跨石彎風高雲冉冉灘急水潺潺野迥
松篁秀境幽雞犬閒輕裝因路險隱耳覺言蠻村釀酤
來薄溪鱗買得慳浦晴鳴鴈浴林暝舞鴉還寺僻殿閣
古堂虛苔蘚斑僧房清夜宿幽夢到鄉關

雜興三首

日出霜晴鳥雀呼東裝還復戒征途黃牛傍岸將孤犢
花鴨浮溪引衆雛橋斷水寒尋野艇路迷山曲問田夫
遠遊看盡溪山景待向龍津畫作圖

歲晚南遷殊未央
曉寒霜霰濕征裳
煙籠山彩遠增翠
風皺溪瀾細漾光
嶺雪未銷宮額粉
野梅初發御鑪香
誰憐飄泊螭坳史
曾向鈞天侍紫皇

盡日監輿山水中
每逢佳處慰飄蓬
拂雲古木陰陰日
夾岸脩篁細細風
遠岫長溪千里碧
斷霞殘照半天紅
殊方景物隨時好
却恨登臨無與同

戲成絕句三首

山色黛眉遠溪聲玉珮珊珊溪山憐逐客故為結清歡

粼粼溪底石五色粲堅圓安得女媧手鍊之將補天
小艇渡行旅往來終日操但令人利涉寧復計劬勞

偶題

日照溪光碧起鱗溪頭鴈鷺自成羣可憐獨鶴歸何處
萬里相隨一片雲

玉山道中五首

悠悠征騎渡溪巖跋涉艱難分所甘泉石幾時歸水北
風煙今夕過江南日輪杳杳銜青嶂天影茫茫浸碧潭

猿鳥不知遷客恨雲間啼叫滿松栟

石路凝霜白山村落月纖溪頭一橋小煙外數峯尖高
畝層成級寒沙軟勝鹽江南風景好無那旅愁添

乍入江南境登臨慰所懷山林自平遠水石巧縈迴風
暖鳥聲媚日斜雲影開故人千里別欲寄一枝梅

石蘚紅依日巖松翠耐霜入溪看岫色和月認梅香歲
暮旅情惡夜寒燈影光勞生真一夢回首意茫茫

行李遠穀水禪扉依玉山煙嵐數峯秀雲水一溪彎小

市晚猶合踈鐘寒自還舊遊如昨日屈指十年間

望龜峯

何日清江使來為碧落趺凝眸望霄漢曳尾謝泥塗霜
曉疑曝甲雲橫如負圖前知儻可仗吾欲問玄夫

述懷

早遊文翰圃誤齒縉紳塗蘭省為郎久霜臺奮舌孤荷
知誠特達勵志敢躊躇屢賜楓宸對親蒙御筆除月卿
論鉅禮柱史進寒儒黼座當陽日螭坳載筆初明堂頌

政事路寢集簪裾繡案橫雕檻天香夾御鑪翠華來寶輦清蹕警嵩呼法駕臨真館芳塵從屬車重瞳瞻日月粹色仰瓊瑜侍立親龍袞書言梁帝謨視朝崇政罷勸講通英餘麗日明金殿輕風響珮琚漏聲寒浙漉槐影綠扶踈紫橐陪時彥黃扉寓直廬仙遊疑閬苑清夢豈華胥遇事肯懷祿銜恩寧惜軀惟慙涉道淺豈恨與時迂犬馬知愛主龜蛇思報珠未終青史志一奏皂囊書誰謂爰絲直端同汲黯愚謫官來劔浦襟被出神都感

激心獨苦飄零歲已徂悽悽念終養冉冉歎征途四海
盡蒙澤孤臣方向隅願迴天上照一起轍中枯

短歌

周家柱史本吾祖唐室謫仙尤所許垂世空餘道德經
傲時且以詩酒名我今去作龍津客學道吟詩真自適
也勝騎馬聽朝雞晴壓塵埃雨壓泥

遣興

遊戲清都不記年謫來猶作地行仙龍墀叩額真率爾

石馬繫門非偶然野寺山莊隨意宿溪魚村釀不論錢
男兒本有四方志出處安時休問天

衝涉脩途僕已疲今宵聊復宿沙溪心懷浙右家無耗
身在江南路欲迷孤鶩斷霞晴杳杳暝煙荒草晚悽悽
登臨誰會悠然意寒日無言又向西

風景正高潔歲律忽崢嶸岸竹森如束山田漫已耕溪
寒幽石出岫遠暮雲橫試問螭頭吏誰令向此行

江南六詠

江南山秀色晴光杳靄間一帶平凝愁翠黛數峯孤絕
聳煙鬟

江南雲片片飛來湘水濱愁絕蒼梧鼓瑟女悵望陽臺
行雨神

江南月依然照我傷離別故人千里共清光玉臂雲鬟
香未歇

江南竹霜霰歲寒依舊綠誰向溪邊養箨龍滴露搖風
一林玉

江南梅昨夜溪頭玉雪開
贈遠欲傳千里恨和煙為折
一枝來

江南客鬢髮蒼浪不堪摘
明時遷逐念前非一夜愁吟
霜月白

宿信州景德寺禪月堂

野寺虛堂倚翠微
雲山極目望中疑
溪寒連艦欄干直
日暮高樓鼓角悲
倒景星河光破碎
亂螢燈火影參差
貫休髣髴英靈在
應笑登臨強賦詩

巖石邨店有石泉梅橘幽雅可愛

巖下鳴泉浙滙飛誰知山店亦幽奇已過野橘分金日
未見寒梅噴雪時旋洗雲杭炊白玉自挑霜蕨縷青絲
慇懃賦詠留巖石他日重來覓舊詩

梁谿集卷五

欽定四庫全書

梁谿集卷六

宋李綱撰

古律詩二

上饒道中已後及遊
武夷作六十九首

上饒道中雜詠三首

過鵝湖留贈昌長老二首

昌老詢予來厯以詩荅之

題石井慈濟泉二首 鉛山道中

小溪 過紫溪值雪

雪中過分水嶺六首 次大安驛雪霽

山家

將次武夷

崇安宰見示武夷山圖記

自入閩境值雪默禱武夷君遊山日雪霽有感

趨真亭

遊仙溪

武夷山

幔亭峯

天柱峯

洞天穴

三姑石

換骨巖

龍潭

獅子峯

觀音巖

兜擔石

三女石

學堂巖

船場巖

雞窠巖

大小藏巖

仙跡石

大小二廩石

鐘模石

鼓樓石

丹竈

仙掌

三層峯

畫鶴

大隱屏

禪庵巖

仙機巖

魏王峯

虎嘯巖

釣臺石

試劍石

折筍巖

仙接石

柴嶺

車錢峯

毛竹洞

睇真館

仙橘

仙竹

泛舟至晞真館遇雪二首

訪李道士二首

紀舊夢

宿棲真館夜雪大作詰旦遂行

題棲真館三十六韻

上饒道中雜詠三首

半世區區何所求
南來豈為稻粱謀
烟嵐遠近濃還淡
石瀨縈迴咽更流
雲外鈎輶聽處好
溪頭略約渡時幽
何須更論他年事
且把風光慰旅愁

鬢毛蕭颯寸餘冠，蒙犯風霜却歲寒。但使孤忠能感激，
豈辭遠謫備艱難。蒼蒼雲木留深景，渺渺深溪瀉暮湍。
獨坐苦吟山寺冷，照人孤月正團圞。

漠漠烟村一笛風，溪山都在夕陽中。遙看天色暮雲碧，
漸見山頭野燒紅。閩嶺風煙知己近，浙江書問恨難通。
暝投山寺憑虛閣，隱耳猶聽響暮鐘。

過鵝湖留贈昌長老二首

雲山深處到鵝湖，萬木森森一徑紆。日落風高鐘倍響，

煙寒林暝鳥相呼宗風振起人能繼祖道流傳德不孤
須信山林真隱地紛紛朝市更何如

謫宦去為劍浦吏稅駕且作鵝湖遊沈沈梵宇殿閣古
寂寂勝地林泉幽祖師道場誰繼嗣妙峯德雲真比丘
夜寒燈下接軟語却恨行客難淹留

昌老詢予來歷以詩荅之

休問西來意吾行日向南悽悽達磨懺歷歷善財參舊
事已不憶新交寧易談維摩本無語非是學三緘

題石井慈濟泉二首

誰將石洞當泉池餘溜濺濺落水陂山骨鑿開蒼瑪瑙
雲腴凝貯碧琉璃龜浮水面寒光動竹舞巖端翠影垂
泉石幽竒天下少祕藏休使北人知

巖石嵌空湛碧泉酌甘鑑靜意蕭然幽深端有神龍穴
虛迥疑藏古洞天雲影漾波光璀璨石渠飛溜響涓涓
會須掬取巖中水洒作膏霖徧八埏

鉛山道中

行李踰江嶠風煙接武夷地靈嘉木秀天闊暝雲垂
石日相樂雪霜寒自遲寄聲山下士掃壁待題詩

小溪

脉脉寒溪徹底明臨流聊復濯吾纓風微靜愛琉璃色
竹密遙聞環珮聲漾月下搖金潋灩涵虛不動鏡澄泓
自憐逐客難淹泊不為溪山景太清

過紫溪值雪

明時報國敢懷安遠謫方知行路難雲隔江鄉來鴈寂

雪飛閩嶺敞貂寒韓詩解道藍關恨賈賦聊憑鵬鳥寬
誰念紫皇香案吏飄零已覺鬢毛乾

雪中過分水嶺六首

寒雲漠漠雪霏霏正是行人度嶺時密洒峯巒開玉府
亂粧林木發瓊枝步高漸入烟霄路望遠都迷澗壑姿
回首江鄉何處是斷蓬飄梗不勝悲

閩山高處却無風密雪飛雲墮曉空去路似從銀色界
此身疑到廣寒宮落梅飄絮來瓊樹涌浪崩雲疊玉峯

景色幽奇無似雪平生觀雪此為雄

藹藹層陰送雪來亂山深處白皚皚積巖錯認藍田玉
著樹全疑庾嶺梅光射九霄來夜月冷凝千嶂蟄春雷
武夷路近須晴霽為卷風雲一餉開

一夜同雲凝不開曉寒整轡馬虺隤千巖萬壑縈紆處
密雪迴風散漫來愁裏溪聲琴的歷望中山色玉崔嵬
溪山得雪尤奇絕模寫無工恨不才

瑤妃遊戲水晶房故剪冰花試曉粧坐見初平巖畔石

化為元放隴頭羊
培堆積玉寒光瑩
頃刻開梅冷艷香
好是碧天雲散後
野蟾來助一輪光

玉龍耕種素芝田
誤入飛瓊小洞天
璧月珠星爭璀璨
瑤環瑜珥鬪嬋娟
水晶宮闕雲腴滑
白玉樓臺霧彩鮮
骨冷魂清難久駐
恍然崑閬夢遊仙

次大安驛雪霽

雪霽烟村風滿林
暮天垂影碧沉沉
一輪明月光相射
千里白雲寒更深
寂寞樽盈陶令酒
飄零淚滿仲宣襟

燈殘夜永不成寐
莊鳥悽然自越吟

山家

青山掩映野人家
翠竹蒼松一徑斜
夜對月鉤沉淺浦
曉看鳥篆印平沙
溪頭馴畜多宜鶩
園裏靈苗可種茶
占盡溪山幽勝處
自將風物向人誇

將次武夷

行行路近武夷山
秀氣蜿蜒百里間
蒼石插天雲縹緲
碧溪通壑水彎環
神仙恍惚誰能識
洞府深沉自不關

我向湖中如得路便應脫屣謝塵寰

崇安宰見示武夷山圖記

征軒欲作武夷遊先借圖經次第求須信神仙真窟宅
故令峯岫巧雕鏤四時花木千巖秀一水波瀾九曲流
明日泛舟山下去按圖細細問蹤由

自入閩境值雪默禱武夷君遊山日雪霽有感

鄙陋安能到古人寸心潛格武夷君誓辭叱散蠻溪霧
詩句驅開衡嶽雲忠讜自應慙吏部精誠何敢並將軍

氛霾卷盡留殘雪粧點峯巒意更勤

趨真亭

煙霞深處一亭閒
石磴紫紆紫翠間
但覺峯巒勞顧揖
不知身到武夷山

遊仙溪

一溪九曲貫羣峯
演漾輕舸淺碧中
杳如誤入武陵去
落花流水山重重

武夷山

百里雲山碧玉林，雕鏤融結見天心。
幔亭會散笙簫遠，天柱風高煙霧深。
畫鶴獨留青嶂表，林花常發紫巖陰。
夢魂清切先曾到，故使飄零特特臨。

幔亭峯

燕罷虹橋絕世氛，曾孫誰見武夷君。
更無裊幕空中舉，時有笙竽靜處聞。
猿鳥夜啼千嶂月，松篁寒鏤一溪雲。
洞天杳杳知何處，翠石蒼崖日欲曛。

天柱峯

巉巉千丈挿烟空始見天南一柱峯絕頂霧開擎日月
半巖雲暝噫雷風俯臨萬壑林芴秀高壓羣山氣象雄
誰道共工曾觸折斷鼇端是女媧功

洞天穴

沈沈幽穴閤雲煙玉宇瓊樓鑲洞天自向壺中飛日月
更於物外起山川劉公隱後今誰繼張湛仙來不記年
紫府若容幽客到誅茅欲卜隱屏前

三姑石

風舞芳林鬢脚垂朝雲行雨濕仙衣不知當日緣何事
化石山頭更不歸

換骨巖

玄化升真十六天靈仙蟬脫翠巖前金堅玉潤留餘骨
密鑲烟霞幾百年

龍潭

百丈清潭合兩溪澄波瑩滑碧琉璃神龍端向潭中睡
何事能容網罟垂

獅子峯

奇石騰擎竹樹蒼
奮髯矯首據崇岡
山深怪底無豺虎
端畏溪頭百獸王

觀音巖

鉢衣珠珞寶花冠
宴坐翛然山水間
應為武夷泉石好
不殊海岸補陀山

兜擔石

仙人戲睹翠蛾眉
空有花餘照夕暉
雲月娟娟風嫋嫋

尚疑玉質在簾幃

三女石

粲粲三英傍碧溪
玉肌雲鬢曉參差
想因巫峽行雲日
記得湘江解珮時

學堂巖

仙官讀徹蕊珠篇
几案巖中自寂然
崑閬圖書藏策府
誰言孤陋解成仙

船場巖

仙艇何年插翠微
雲蓬烟櫂尚依依
凌虛欲鼓天邊柂
喚取雙龍背負飛

雞窠巖

磔磔天雞啼曉烟
仙家風景鎮芳妍
自從彩翼飛仙後
只有遺棲寄嶺巔

大小藏巖

玉棺插徧兩巖傍
石罅開如小洞房
鍊就陽魂歸紫府
空餘靈骨此中藏

仙跡石

當年天姥戲溪邊二石遺蹤膝宛然却笑茂陵緱氏跡
只憑方士口中傳

大小二廩石

仙家何事亦贏糧廩石團團峙道傍應駕斑龍耕紫石
深儲芝玉廩中藏

鍾模石

誰鑄三鐘鑠乳形不須筍簾自能鳴仙君欲奏賓雲曲

只感清霜便發聲

鼓樓巖

洞天擊鼓集羣仙石作高樓鏤翠烟萬籟不鳴霜月曉
簫聲猶聽鼓聲傳

丹竈

金鼎丹成透碧天尚留丹竈在層巔
一丸五色光騰夜乞取從教作散仙

仙掌

玉指纖纖煙靄中
揮雲映日掌微紅
只疑華岳留蹤後
更向閩山映碧峯

三層峯

三層靈峯氣象豪
噴雲洩雨不崇朝
懸崖峭壁無人到
只恐峯頭是碧霄

畫鶴

誰畫千年老令威
丹青今古照清輝
玄裳朱頂蒼崖畔
豈憶沖天萬里飛

大隱屏

高峯崛起翠微屏何事呼為大隱名自是市朝人不到
非關洞戶鎖崢嶸

禪庵巖

虎嘯猿啼月滿天山僧宴坐正安禪不知隻履歸何處
尚有庵巖名字傳

仙機巖

雲去仙機杼軸空報章何日已成功天孫織就烟霞錦

吹落溪山夕照中

魏王峯

危峯孤峭與天通
猶有當時羽化蹤
仙馭自隨鸞鶴遠
玉樓金鎖白雲封

虎嘯巖

昔年雕虎嘯幽巖
千里清風皺碧潭
虎去巖空風自遠
一林花雨落毵毵

釣臺石

釣石戕戕枕碧溪仙人於此亦垂絲想當月白風清夜
正是寒魚食餌時

試劍石

鍊氣為金鑄劍成且將頑石試青萍光鉉鬱鬱冲牛斗
斬盡妖魔若發劍

折筍巖

玉府鏘鏘玉筍林誰將移種翠巖陰
斑猶帶當時擇
照水籠烟幾百尋

仙接石

天風吹折碧琅玕神化茫茫接豈難
鳳髓鸞膠天上有
世人休作等閑看

紫嶺

林花不逐歲寒凋半嶺煙光媚遠霄
須信仙家風景好
四時峯岫紫岩堯

車錢峯

塵緣洗盡便神仙
泉石幽奇即洞天
我欲雲崖結茅屋

侍從天姥借車錢

毛竹洞

洞生毛竹綠猗猗
枝幹扶疎滿洞垂
傳是羣仙遊息地
蔽藏不許世人知

晞真館

小溪詰屈巧縈迴
行到晞真景更奇
路轉山回疑不見
此中凝望却參差

仙橘

巖畔陰森橘樹垂青青亦有歲寒姿我來恨在秋風後
不見霜包結實時

仙竹

陰崖翠竹自檀欒瘦節疎枝特地寒雖未化龍歸洞府
正宜和月掃天壇

泛舟至睇真館遇雪

雲散天開一餉中依前飛雪落層空瓊花巧綴巖端樹
玉屑飄隨洞裏風溪淺且遊仙掌石雲深不見幔亭峯

斯遊清絕平生少圖畫方知未是工

行到清溪六曲頭森然峯岫照人幽雪花拂水輕輕舞
石瀨依巖淺淺流不盡清光常在目未窮幽興且回舟
追尋欲徧神仙窟須向他時卜再遊

訪李道士

青山中有一道士獨卧烟霞晝掩扉踏雪叩關知意重
擁爐相與話真機

誅茅獨占溪一曲時有白雲來伴宿自言身在此山中

暮暮朝朝看不足

紀舊夢

余今夏夢乘舟行亂石間四顧峯巒奇秀如玉色
者覺頗異之及謫官劔浦道武夷山小舟泝流水落
石出徧覽勝槩至晞真館雪作巖石皆白恍如舊遊
然後信出處之分定而斯遊清絕已先兆於夢寐雖
欲不到不可得也作小詩以紀其事

清夢先曾到武夷玉峯積雪倍幽奇小舟遊罷尋歸路

恰似翛然夢覺時

宿棲真館夜雪大作詰旦遂行


一夜武夷三尺雪巖壑無聲聞竹折雲峯烟岫望都迷
玉樹瑤林寒更發山中道士毛骨奇勸我留宿山前齋
輕裝冒雪非得已仙賞更待他年來

題棲真館三十六韻

武夷古洞天奇峯三十六一溪貫羣山清淺縈九曲溪
邊列巖岫倒影浸寒綠翩如鸞鳳翔矯若虬龍感樓觀

聳岩堯屏幃亘重複蛻仙骨遺金遊女肌削玉鷄棲層
巖巔船插斷崖腹學館存几案仙機餘杼軸藍光瑩澄
潭虹影掛飛瀑翠竹蔭天池蒼苔封石屋繪禽頂長丹
遺跡指如掬峨峨天柱峯幔亭連翠麓傳聞武夷君嘗
此會仙俗飛橋幾千丈絕頂亘山足障以翠雲屏藉以
紫霞褥瑤樽傾沆瀣玉豆脯麟鹿仙妃奏賓雲金鼓間
絲竹酒酣歌夕暉歎息光景促曾孫誰復在往事空遺
躅至今風月夜笙簫響虛谷地靈饒泉石山潤秀草木

坐使七閩人蔭此仙靈福嗟予真散材性愛山水酷仙
經與地志名字久已熟薄官方區區仙賞宜碌碌神
遊仙夢寐幽覲寄圖錄寧知因謫宦乃得厭所欲沿泝
窮幽深應接勞耳目開襟豁懷抱壯觀慰幽獨却邀白
雲歸伴此巖下宿夜寒夢魂清曉寒輕裝速仙遊須再
來何當謝羈束



梁谿集卷六

欽定四庫全書

集部

梁谿集卷八

詳校官庶吉士臣張溥

侍讀臣孫球覆勘

總校官知縣臣楊懋珩

校對官中書臣潘奕雋

謄錄監生臣莊承簪

欽定四庫全書

梁谿集卷七

宋 李綱 撰

古律詩三

自入建陽反抵沙陽庚子歲已後作七十首

贈舅氏吳子和

自建陽泛舟至建安

建溪再得雪鄉人以為宜茶

天寧老齊珏錄慶餘師開堂疏見示

梅花二首

劍浦道中二首

自建安陸行至劍浦

劍潭

雙溪閣

沙陽

平津晚望

抵沙陽之夕民居延火

除夜

元日

立春日

春詞二十首

用韻賦梅花三首

再賦一首

吳鄧同遊陳氏園

鄧純彥家蘭盛開見借一本四首

次韻陳介然幽蘭翠栢之作幽蘭二首翠栢二

首

次韻鄧志宏梅花

上元日二首

墨戲六首

偃風頂雨絕句

再用陳園韻示鄧志宏

惜花

乘興遊鄧季明園池邀志宏同會再賦陳園韻

招陳幾叟小飲

志宏以墨戲見遺并貺古風次韻答之且歸其

畫

再用奴字韻呈幾叟

以墨戲歸志宏復有詩來次韻

再次韻

志宏復有詩來再賦兩篇為報

贈舅氏吳子和

契濶從來歎歲陰幸因謫宦款清襟
犯顏逆耳事已往問舍求田意轉深
豈有聲名驚海寓且忻山水共登臨
渭陽情重知何贈玉佩瓊琚稱我心

自建陽泛舟至建安

一葉輕舠漾碧流，却憐舟子解操舟。
急灘亂石疑難渡，短楫輕撓反自由。
去國飄零同泛梗，凌波超忽逐飛鷗。
建溪百里纔終日，過盡千巖萬壑幽。

建溪再得雪鄉人以為宜茶

閩嶺今冬雪再華，清寒芳潤最宜茶。
泛甌欲鬪千金價，著樹先開六出花。
圭璧自須呈瑞質，旗槍未肯放靈芽。
傳聞龍餅先春貢，已到鈞天玉帝家。

天寧老齊珏錄慶餘師開堂疏見示

一別閩山三十年重來相見兩依然
煩師錄示當時語
猶喜曹溪一派傳

梅花二首

寒梅昨夜洩春光
標格依然壓衆芳
裊裊露枝團玉白
輕輕烟蕊簇金黃
瑤妃謫墮溪村寂
雪片飄殘月徑香
却笑漢宮爭寵女
競將嬌額學新粧

數枝玉雪小溪濱
先得陽和一點春
冷豔幽姿難與並
暗香疎影孰爲鄰
廣平不害心如鐵
靖須知句有神

亦對寒芳動詩興却嫌標格太清真

劍浦道中二首

宿霧霏霏隱翠嵐傍溪幽石自巉巖樵歌遞響來危徑
漁網連舟集小潭野渡無人閒寂寂林花著雨落穆穆
誰知逐客淒涼意歲宴南遷劍浦南

此去平津路匪遙嶺雲溪雨自蕭蕭山深瀉澗泉長響
地暖凌寒草不凋放逐却教窮水石登臨因得狎漁樵
誰憐澤畔人憔悴更把騷辭賦大招

自建安陸行至劔浦

聞道延平黯淡灘舟行至此慘愁顏千金素佩垂堂戒
九折寧辭去路艱涉險雖知憑信義藏幽須信足神姦
勞生自取那惆悵只羨飛雲自在閒

劔潭

當時神劔埋豐城鬱鬱光氣衝斗星千年古獄斷幽局
下得至寶雙青萍雌雄不知誰與名拭以異土聊發劔
龍文星彩愈晶熒正晝無影魑魅驚雄飛霄漢隨雷霆

雌躍淵水歸延平没人下瞰風濤生天矯化作蚪龍形
茂先博識非無憑神物終合信有徵沈沈潭影含虛明
寶氣久秘必復呈會當採取搜元精佩服坐能驅百靈
姦諛膏血紛羶腥與爾相攜遊太清

雙溪閣

凌虛高閣枕雙溪四出飛簷鳥翼齊山鏤煙光青合匝
水分丁字碧淒迷蟠虬舊化張公劍翦鳳今留魯國題
放逐因能窮勝賞登臨那惜醉如泥

沙陽

沙陽雖僻左風土冠閩城誰知亂山裏有此膏壤平邑
屋號華麗谿山倍澄明七峯轉月色十里無灘聲民俗
素康阜士夫多俊英食饒魚稻美蔭有松竹清筦庫職
易辦塵勞念尤輕蕭然飄泊迹忘此羈旅情忽忽歲改
律欣欣木向榮何當脫拘縛春畝得躬耕

平津晚望

春入沙陽花滿林七峯倒影碧沈沈飢鳶掠水盤旋久

戲鴨浮溪演漾深風景只添流落恨烟光遙鑲別離心
浙西三月無消息始信家書抵萬金

余抵沙陽之夕民居延火幾焚官局因念以論水得

罪復以火驚殊可笑歎戲成此詩

余生辰巳未
火甲申水

囊封論水謫天涯纔到沙陽火復隨本為玄冥遭放逐
却因回祿更驚疑生辰端是窮申未學易何曾悟坎離
爛額焦頭那足惜只愁蓬跡久飄移

除夜

年來三百六十日忽忽過盡唯今宵天涯遠謫罪未解
家問久缺心無聊強傾濁酒慰愁獨坐對寒燈尤寂寥
鐘鳴漏盡不成寐世事又屬明年朝

元日

去年元日朝明堂對立玉皇香案傍今年元日謫沙陽
獨在天涯家一方君恩未報已飄泊親老欲養徒徬徨
東風回首帝鄉遠白雲望斷吳天長

立春日

春風吹到海南邊氣候渾如二月天
幡勝戴來聊應節鼓簫鳴處已祈田
花梢柳眼爭明媚溪色山光愈翠鮮
生菜春盤誰與送玉人纖手自嬋娟

春詞二十首

余謫沙陽寓居興國佛祠寢西小軒
春至梨花盛開玉雪可憐脩篁嘉木
幽禽百轉每晨坐讀書午睡初醒
把酒寓目慨然感懷因成春詞二十
篇以紀景物可以興可以怨庶幾乎
詩人之旨覽者無誚焉

一樹梨花傍小軒結根幽寂更芳妍東君有意憐流落
故遣瑤姿墮目前

晚來急雨作輕寒只恐梨花落點殘喚起小童窓外看
玉妃何事淚欄干

花開好鳥曉關關驚覺幽牕小夢殘宿酒未醒人早起
透簾紅日上三竿

蕭蕭檻外翠琅玕瘦節疎枝特地寒誰謂幽居太寥閨
此君長此結清歡

春光淡蕩一番新
花氣氤氳惱殺人
只恐花飛春又老
須將醕酤對芳辰

清晨開卷坐幽牕
深注爐煙一縷香
汲水養花顏色好
向人端似炫新粧

春日遲遲午睡濃
夢魂飛過浙江東
無端花底間關舌
喚起搔頭兩鬢蓬

寂寂春林杜宇啼
勸人只道不如歸
我今歸思何須勸
借爾翩翻兩翅飛

春色困人渾似酒花枝照眼恰如人東君若解憐愁客
莫使花飛減却春

漠漠輕煙度短牆春寒料峭怯羅裳惜春只怕多風雨
雲影披離漏日光

幽禽百轉舌如簧院宇深深花木香飄泊傷春惟泥酒
不知林外已斜陽

誰使鳴禽自在啼感春端似惜芳時一枝暫寄休饒舌
靜處須防挾彈兒

春來南國藹韶光
百卉嫣然競早芳
語燕啼鶯將婉孌
遊蜂舞蝶已顛狂

青鳥飛來動檻花
翠衿紺趾哢交加
向人自解傳消息
疑是來從阿母家

微月籠雲黯淡明
忽聞索索雨來聲
可憐窗外梨花老
一夜飄殘雪片輕

聒聒鳴鳩喚雨來
蕭蕭寒響滴空階
不知逐客傷春恨
多少殘英點翠苔

飄風驟雨餉時間墮盡飛花滿地殷自是羣芳將結實
非關風雨故摧殘

桃花零落逐風飛地上紅多枝上稀春色陡然歸豔杏
梢頭還欲銜芳菲

南方春早花亦早爛熳開盡枝頭紅記得上林當此際
遊人殊未探芳叢

一年春事遽如許千里旅愁何似生濁酒飲餘惟五合
殘書讀盡忽三更

用韻賦梅花三首

寒梅幾樹開前村
靚粧綽約歸仙魂
橫斜影落石溪淺
皓潔色洗煙嵐昏
幽香暗動松竹徑
清格自羞桃李園
窮冬萬里霜雪積
獨得一點陽和溫
冰姿最宜夜月白
玉彩更炫朝霞暎
明妃失意去朔漠
阿嬌無寵扃長門
芳容寂寂誰復顧
雅意耿耿今何言
天涯相對且相樂
為爾吸盡黃金樽

草木凍死山中村
惟有梅花能返魂
孤根不怕雪霜苦

冷豔似笑風雲昏披芳獨占歲寒地擢秀肯待春風園
溪邊寒影自的的月裏皓色還溫溫飄零疎雨夕煙暝
厭浥清露晨光瞰玉妃遊戲隘崑閬縞衣飛出瑤臺門
幽姿耿介不可狎欲問所以難為言嗅花嚼蕊更奇絕
侑我一醉玻璃樽

雲山縹緲煙水村嫣然顧我驚離魂凝情不語自脉脉
旅愁易感方昏昏我家梁谿富泉石雪裏數株開北園
天涯相見一笑粲玉色不減當時溫為君清夜不成寐

月落已見東方曦會栽千樹徧綠野豈羨五柳垂衡門
臨風三嗅長太息欲辯此意還忘言何當歸去老三徑
攜幼入室酒盈樽

再賦一首

十年不踏江南村想像梅花勞夢魂豈惟捧心笑西子
只恐舉步迷東昏繁英恍訝羣玉府墮藍悄愁金谷園
冰肌自飲晨露白粉質不浴驪湯溫我行閩嶺喜入眼
皓彩照耀咸池暎煙凝雲慘更愁絕積雪欲堆袁安門

天香國豔世無匹何用苦死教能言吹殘樓角真可惜
莫厭東燭臨芳樽

吳慎微鄧志宏同遊陳氏園

我本惜春人常恐春色老沙陽渺天南春到一何早羣
芳忽爛漫自覺被春惱招邀適名園景物得幽討燦燦
桃李妍娟娟松竹好虛室自含風迴塘已生草酌酒對
芳菲論文慰懷抱瓌奇窺李杜寒色笑郊島軟語既溫
溫高談方浩浩二子若驂騑輕車駕長道而我正飄蓬

摧殘已枯槁家在天一涯情若風中翹幸然得相從豁
我憂心擣青春能幾時落花看又掃寧辭金壘空坐使
玉山倒世事可兩忘悠悠信蒼昊

鄧純彥家蘭盛開見借一本

誰道幽蘭是國香山林僻處更芬芳從今借得佳人佩
伴我春堂晝夢長

特地聞時却不香暗中芬馥度微芳寂然鼻觀圓通處
深院無人春晝長

噴了清香開了花却歸盆檻付公家來春花發香尤好
預借幽根茁露芽

纖纖碧葉淺黃花暗淡香飄物外家培壅莫教摧露下
春風歲歲長靈芽

次韻陳介然幽蘭翠栢之作

幽蘭出深林得上君子堂置之顧盼地藹藹振餘光春
風茁其芽暗淡飄天香刈防豈無用授夢方薦祥紉佩
美屈子披風快襄王秋高白露下摧折增感傷願與菊

同瘁羞隨猶並長
收根歸舊林肯改無人芳

溫風茁幽蘭採掇置中堂
孤根亦何有借此軒墀光
耿不自惜淒微泛餘香
蕭然山林姿詎是邦家祥
譬猶美芹子乃以薦君王
棄置固其宜零落誰復傷
賦詩慰寂寞念子故意長
願言同心人去去揚清芳

右幽蘭

翠栢方歲寒獨立羣木外
不為衆所知此理實難會
惜哉結根淺未使極高大
天風動虬枝蕭瑟起清籟
儻無

斤斧殘會拂千丈黛空餘霄漢志不逐雪霜改委棄老
空山浩蕩付玄宰

崇岡有翠栢摧榦煙靄外託非不得地據此羣山會青
青歲寒姿自許百圍大舞月散清影號風振虛籟誰云
根如石已見色參黛幽人挺高懷顧我顏不改知音自
昔難多財為爾宰

右翠栢

次韻鄧志宏梅花

空山極望皆黃葦欲挽天河聊一洗溪邊的皜見梅花
冷藥踈枝澹煙水安得健步移我堂清夜桂魄來孤光
人寰塵土飛不到鼻觀寂寂聞天香吾衰丈思久不起
見子新詩端可喜落英坐使笑天桃結實定知非苦李
年來蹤跡墮空濛與子追隨邈未窮琢磨妙句覩天巧
為我一振詩家風

上元日二首

去年玉輦侍端門燈滿黿山訝曉曦寂寞沙陽山水裏

也將膏火照黃昏

應為飄零有故侯
競將燈火簇谿樓
田夫野婦盈衢巷
怪我還能與共遊

墨戲六首

鄧志宏所蓄墨戲凡六曲盡其妙求予題跋各為賦
小詩以見意

拳蠹

屈折金石瘦偃蹇虬龍怒蕭然少生意端為根中蠹

枯折

歲晚風號寒琅玕半吹折雖殘栖鳳枝終抱凌霄節

宿枝

踈筠輕帶粉老葉飽經霜試問枝頭實何年集鳳凰

新葉

解籜能幾日成陰不待春天然為誰笑風露一枝新

引根

土潤引新萌虬鞭獨處行此君人不厭何惜滿林生

筵筍

養就籜龍兒爛斑角未齊斧斤休縱手會看拂雲霓

六竹外尚有偃風頂雨二本留故家志宏欲之而未
得戲作絕句附卷末庶幾異日悉歸志宏也

六樣根莖妙入神兩枝風雨更清新此君族類須收拾
莫使飄零歎失身

再用陳園韻示鄧志宏

青松更雪霜始見枝幹老挺然節操士安用致身早吾

裒習禪觀頗覺得無惱每於文字間未免尚窮討遇物
空吟哦愧乏句語好有時肆狂言自哂太草草儒生捨
翰墨無與寄幽抱富貴非所願神仙渺雲島寧知萬卷
中養此一氣浩子若汗血駒振轡千里道我如鍛翮鴻
毛羽半摧槁適然相值遇豈異宛丘翮新詩迭唱酬險
韻類虛擣文章雖未技塵語貴除掃勉哉扛鼎力迴此
狂瀾倒此外復何為窮通付是昊

惜花

斷水養花花已老零落春風寒不掃從教几案積殘紅
尚有餘香慰衰槁

乘興遊鄧季明園池邀志宏同會再賦陳園韻

幽人築小圃自樂不知老聞名雖已熟相見苦不早忘
懷傾蓋間什我羈旅惱春風入芳林乘興聊一討嘉葩
寒未開美木晴更好飄零桃與杏殘紅委煙草急令招
小阮談笑款清抱披襟步方池散策窮遠島翛然適我
情忘此歸志浩人生暫寄身寵辱何足道舐痔得車多

未可驕黃犒一杯且相屬起舞不須翻文楸響玉子更
試兵家擣羸形乍泉漲猛勢驚電掃應憐客素癡屢勸
罰觥倒掃待月華生清光滿春昊

招陳幾叟小飲

開樽欲約玉川子致鯉先遣長須奴春時海燕光涎涎
風暖城烏尾畢逋幸有異書并古字可無白飯與青芻
虛堂隱几共談笑應信今吾非故吾

志宏以墨戲見遺并貺古風次韻答之且歸其畫

老坡墨戲吾最許雨葉風枝無點上幽懷寄此管城穎
妙質森然會稽楮要須胃次竹先成故使落筆前無古
披圖但愛凌雲姿作贊愧乏驚人語嗟予迂濶與世疎
酷嗜栽培如老圃築園會與種千竿開國便勝封萬戶
遺予此畫意已勤奪人之好道所禦封題依舊送書房
得畫何如得竹愈

再用奴字韻呈幾叟

平生志尚在丘壑肯學衛霍追匈奴縣上之田方欲隱

草堂之靈休謝逋富貴於人何翅夢理義悅我真如芻
脫交夫子談道關應笑連叔驚肩吾

以墨戲歸志宏復有詩來次韻答之

玉局老仙人共許秀骨于今已黃土人間無復見文章
空餘戲墨歸囊楮子能藏蓄真好事便可祕惜傳千古
試將短句贊幽姿却對此君難下語年來懶惰百事廢
欲把鋤犁逐農圃會栽脩竹滿園池為引清風到庭戶
子詩往復句益奇發我狂吟那可禦超然對竹更吟詩

此病未知誰得愈

再次韻

落筆蕭森遽如許墨為根莖紙為土眉山作此共言好
譬猶字法稱虞褚世人畫竹不畫意謾捨丹青欲侔古
胸中幹葉本天成心手應時那可語此君於我定有緣
每念移根栽小圃開圖忽見數株新却怪龍孫入吾戶
年來幾欲斷吟哦照眼還成自難禦發緘又復讀佳篇
詩癖遙知猶未愈

志宏復有詩來再賦兩篇為報念其往復之無已
也故寓意卒章以止之

平生愛竹端自許欲種千竿滿吾土豈知好物不須多
只費東坡數畚楮酒酣弄筆寫寒姿一洗丹青空萬古
我今觀畫已蕭然矧對吟風如共語淵明荒徑便拋官
仲子辭官歸灌圃終年端坐飽太倉更欲此君長傍戶
亦知兩者固難兼無那幽懷終不禦縱教富貴欲何為
不若歸來栽竹愈

數君妙質來何許生氣森森如得土依然對此未忘情
亦欲懷之恨無楮宿枝新葉自清妍蠹拳枯折尤奇古
已將金玉照雙眸更得珠璣編好語男兒學古貴根源
餘力遊茲文翰圃沈思六藝見同歸縱覽百家知異戶
浩然養氣塞天淵沛若江河知孰禦却憐彫斲愁肺肝
但莫苦吟當自愈

梁谿集卷七